



論語類考卷第六

應城陳士元著

蕭山陳

春校

人物考

第一

目三十四

孔子

元按史記世家孔子名丘字仲尼其先宋人父叔梁紇母顏氏以魯襄公二十二年庚戌之歲十一月庚子生魯昌平鄉聊邑生而圩項因名曰丘本姓解云孔子之先宋之後也微子啓帝乙之元子紂之庶兄以圻內諸侯入爲王卿士武王克殷封紂之子武庚於朝歌武王崩而與三叔作難周公成王東征之乃命微子爲殷後國於宋其弟曰仲思名衍或名泄嗣微子之後號微仲生宋公稽二微雖爲宋公而猶以微之號自終至於稽乃稱宋公焉宋公生丁公申申生緡公共及襄公熙熙生弗父何及厲公方祀弗父何以下世爲宋卿何生宋父周周生勝勝生正考甫考甫生孔父嘉五世親盡別爲公族故後以孔爲氏焉孔父生子木金父子木金父生翬夷翬夷生防叔避華氏之禍而奔魯防叔生伯夏伯夏生叔梁紇求婚顏氏女曰徵在徵在旣廟見以夫之年大懼不得有男而

私禱尼丘之山以祈焉生孔子故名丘字仲尼孔子三歲而叔梁紇卒葬於防路史云孔子四十有九表堤眉谷竅參臂駢脇腰大十圍長九尺有六寸時爲長人爲魯司寇齊人歸女樂乃去之歷於諸侯莫能用也十有三年而歸於魯然後樂正禮得乃刪詩定書繫周易作春秋以示炯戒自惟商後而宋不足徵乃述考志追商頌以續魯故曰明王不興天下其孰能宗予不忘宋也哀公十六年四月己丑卒哀公誄之曰旻天不弔不憇遺一老俾屏余一人以在位煢煢余在疚嗚呼哀哉尼父葬魯城北泗上西漢平帝元始元年諡褒成宣尼父東漢和帝封褒尊侯後魏文帝太和中改諡文宣尼父後周宣帝大象二年追封鄒國公隋文帝贈先師尼父唐太宗贈先師高宗乾封二年贈太師武后封隆道公玄宗諡文宣王宋眞宗加諡至聖文宣王元加大成至聖文宣王大明嘉靖九年改稱至聖先師孔子羣賢皆改封爵稱子云

孔鯉

朱子曰鯉孔子之子伯魚也

元按家語云孔子年十九娶於宋之升官氏之女

一歲而生伯魚時魯昭公遺之鯉夫子榮君之賜因名其子爲鯉旣長哀公以幣召鯉稱疾不行哀公十二年卒宋封泗水侯一統志云鯉墓在宣聖墓東

顏路

朱子曰顏路淵之父名無繇少孔子六歲孔子始教而受學焉

元按三氏志云顏之先出自黃帝越八世有曹姓者始國于邾至周武王封其裔爲邾子又六世而邾武公字伯顏者爲魯附庸遂因武公字爲顏氏後十四世皆仕魯爲卿大夫至爲魯邑宰者卽無繇之父也弟子傳云顏無繇字路顏回父父子嘗各異時事孔子家語云孔子始教於闕里而路受學焉唐贈爲杞伯宋封曲阜侯

顏回

朱子曰回孔子弟子姓顏字子淵

元按潘府氏通紀云顏回父無繇爲魯卿士娶齊姜氏以昭公戊子歲十一月丙申生回弟子傳云

顏回魯人字子淵少孔子三十歲年二十九而髮盡白蚤死家語云回年二十九而髮白三十二而

死今較其年則顏回死時孔子六十一然伯魚年五十先孔子卒卒時孔子年七十也是回死在伯魚之前矣而顏路請車爲椁子曰鯉也死有棺而無椁王肅以爲伯魚未死孔子之設辭耳豈人情哉伯魚蓋死在回前年數錯謬未可詳也孔子圍陳蔡時年六十三而回年三十三孔子稱從我陳蔡德行顏淵則是時回尚無恙其後孔子使子貢至楚楚王欲以書社地封孔子令尹子西曰王之輔相有如顏回者乎則回死非三十二歲明矣唐贈兗國公配享先聖元贈復聖公一統志云墓在兗州府曲阜縣防山東南二十里

仲由

朱子曰由孔子弟子姓仲字子路

元按弟子傳云仲由字子路魯之卞人也少孔子九歲子路性鄙好勇力志伉直冠雄雞佩豸豚陵暴孔子孔子設禮稍誘子路子路後儒服委質因門人請爲弟子後仕衛爲大夫孔悝之邑宰蕢賸與孔悝作亂石乞壺黻攻子路擊斷子路之纓子路遂結纓而死孔子聞衛亂曰嗟乎由死矣已而果死家語云仲由一字季路唐贈衛侯宋封河內

侯改封衛公

有子

朱子曰有子孔子弟子名若

元按鄭玄云有若魯人弟子傳云有若少孔子十三歲家語云少孔子三十三歲綱目前編於周景王八年甲子書魯有若生是少孔子十三歲蓋從弟子傳也門人尊有若不以字行而稱有子故後之人遂不知其字耳孔子沒弟子以有若狀似孔子相與師之曾子曰不可他日弟子進問有若默

然無以應唐贈卞伯宋封平陰侯潘府氏通紀云

論語類考 卷第六

五 湖海樓雕本

有若字子若薛應旂人物考云有若字子有似無

據

曾皙

朱子曰皙曾參父名點

元按弟子傳云曾蒧字皙蒧與點同乃夏后氏之

裔少康之子曲列封於郕者秋襄公六年莒人滅

郕郕太子巫求屬於魯爲之大夫弗聽昭公四年

莒乃取郕巫於是改郕爲曾遂以爲姓巫生阜阜

生點點生參參之子三人元申華孫西四世皆賢

不仕於魯以取郕故故點以狂自廢孔子未嘗裁

之察其志也不然則羣賢侍坐孔子方探其用世之志而點獨異於三子之撰蓋不仕於魯亡國之義然爾洪邁氏云傳記所載曾皙待其子參不慈至謂因鉏菜誤傷瓜以大杖擊之仆地此戰國時人妄爲之辭耳曾皙與子路冉有公西赤侍坐獨蒙吾與之褒則其賢可知有子如參而忍擊之幾死乎孟子謂曾子養曾皙酒食養志無擊杖仆地語也唐贈宿伯宋封萊蕪侯

曾子

朱子曰曾子孔子弟子名參字子輿

論語類考 卷第六

六 湖海樓雕本

元按弟子傳云曾參南武城人字子輿少孔子四十六歲孔子以爲能通孝道故授之業作孝經十篇又所著有曾子二卷家語云曾參字子輿博物志云曾參字敬伯唐贈郕伯宋封郕國公配享先聖元贈宗聖公一統志云墓在兗州府嘉祥縣南四十里

閔子騫

朱子曰閔子騫孔子弟子名損

元按弟子傳云閔損字子騫少孔子十五歲鄭玄氏云魯人容齋三筆云論語所記孔子與人語及

門弟子并對其人問答皆斥其名未有稱字者雖顏冉高第亦曰回曰雍惟至閔子獨云子騫終此書無指名昔賢謂論語出於曾子有子之門人子冉意亦出於閔氏觀其所記閔子侍側之辭與冉有子貢子路不同可見矣韓詩外傳有孟嘗君請學於閔子之事妄甚唐贈費侯宋加瑯琊公改封費公一統志云墓在濟南府城東五里又東昌府范縣南四十里亦有閔子騫墓

仲弓
朱子曰雍孔子弟子姓冉字仲弓

論語類考 卷第六

七 湖海樓雕本

元按弟子傳云冉雍字仲弓家語云伯牛之族少孔子二十九歲鄭玄氏云魯人也子貢曰在貧如客使其臣如借不遷怒不深怨不錄舊罪是冉雍之行也唐贈薛侯宋封下邳公改封薛公一統志云墓在兗州府曹縣東南五十里又東昌府冠縣北二十五里亦有冉雍墓未知孰是

冉伯牛

朱子曰伯牛孔子弟子姓冉名耕

元按弟子傳云冉耕字伯牛鄭玄氏云魯人孔子節小物則以伯牛侍曰吾以子自厲也唐贈魯侯

宋封東平公改封鄆公一統志云墓在兗州府東平州西二十五里又滕縣南三里與河南府孟津縣西俱有耕墓未知孰是

冉有

朱子曰冉有孔子弟子名求

元按弟子傳云冉求字子有少孔子二十九歲鄭玄氏云魯人子貢曰恭老慈幼不忘賓旅好學博藝省物而勤已是冉求之行也唐封徐侯宋封彭城公改封徐公

子貢

論語類考 卷第六

八 湖海樓雕本

朱子曰子貢姓端木名賜孔子弟子

元按弟子傳云端木賜衛人字子貢少孔子三十一歲田常作亂憚高國鮑欲移兵伐魯子貢一出存魯亂齊破吳彊晉而霸越子貢好舉廢與時轉貨貲相魯衛家累千金卒於齊唐贈黎侯宋封黎陽公改封黎公

子夏

朱子曰子夏孔子弟子姓卜名商

元按弟子傳云卜商字子夏少孔子四十四歲孔子既沒子夏居西河教授爲魏文侯師其子死吳

之失明家語云子夏衛人小司馬索隱云子夏文學著於四科序詩傳易又孔子以春秋屬商又傳禮著在禮志陝西通志云郃陽縣有子夏讀書洞洪邁氏云子夏非魏文侯師也子夏少孔子四十四歲孔子卒時子夏年二十八矣是時周敬王二十一年至威烈王二十三年魏始爲侯去孔子卒時七十五年文侯爲大夫二十二年而爲侯又十六年而卒姑以文侯之歲計之則子夏已百三十餘歲矣方爲諸侯讎豈其然乎唐贈魏侯宋封河東公改封魏公

論語類考 卷第六

九 湖海樓雕本

子游

朱子曰子游孔子弟子姓名偃

元按弟子傳云言偃吳人字子游少孔子四十五歲家語云子游魯人索隱云偃仕魯爲武城宰耳今吳郡有言偃冢蓋吳人爲是唐贈吳侯宋封丹陽公改封吳公

子張

朱子曰子張孔子弟子姓顓孫名師

元按弟子傳云顓孫師陳人字子張少孔子四十八歲子貢曰美功不伐貴位不喜不侮不佚不傲

無告是顓孫師之行也唐贈陳伯宋封宛邱侯再封陳國公陞才哲位

子賤

朱子曰子賤孔子弟子姓宓名不齊

元按家語云宓不齊字子賤少孔子三十歲弟子傳云少孔子四十九歲然宓姓當作處楚詞辨證補註云處子賤卽伏羲之後顏之推家訓云兗州公永昌郡城舊單父地也東門有子賤碑以伏生卽子賤之後史記作密不齊漢書伏虔又作服虔路史云伏羲之後有伏氏宓氏處氏密氏服氏豈五字皆可通用耶子賤所著書有宓子十六篇唐贈單父伯宋封單父侯

公冶長

朱子曰公冶長孔子弟子

元按弟子傳云公冶長齊人字子長家語云公冶長魯人能忍恥孔子以女妻之范甯云字子芝又左傳釋例及路史皆云公冶氏魯公族也則當爲魯人唐贈莒伯宋封高密侯博物志云公冶長墓在城陽姑幕城東南五里墓極高一統志云墓在

青州府諸城縣西四十里

南宮适

朱子曰南宮孔子弟子居南宮名縮又名适字子容諡敬叔孟懿子之兄也

元按論語有兩南宮适其一爲武王亂臣其一爲孔子弟子史記弟子傳云南宮括字子容家語云南宮縮鄭玄氏註檀弓云南宮縮孟僖子之子南宮閱也又左傳昭公七年孟僖子將卒召其大夫云屬說與何忌於夫子以事仲尼以南宮爲氏杜預氏註云說南宮敬叔也孔穎達氏云南宮氏也敬諡也叔字也又字容又字括名說又名縮也邢

論語類考 卷第六

十一 湖海樓雕本

樊遲

朱子曰樊遲孔子弟子名須

元按弟子傳云樊須字子遲少孔子三十六歲鄭玄氏云齊人家語云魯人蓋樊皮之後唐贈樊伯宋封益都侯

澹臺滅明

朱子曰澹臺姓滅明名字子羽

元按弟子傳云澹臺滅明武城人字子羽少孔子

三十九歲狀貌甚惡欲事孔子孔子以爲材薄旣已受業退而修行行不由徑非公事不見卿大夫南游至江從弟子三百人設取子去就名施乎諸侯孔子聞之曰吾以貌取人失之子羽子貢曰貴之不喜賤之不怒苟利於民矣廉於行已是澹臺滅明之行也漢書云夫子旣沒弟子散居四方各明夫子之道而澹臺滅明居楚水經註云澹臺子羽齋千金璧由延津渡河陽侯波起兩蛟夾舟子羽曰吾可以義求不可以威劫操劍斬蛟蛟死乃投璧於河三投而輒躍乃毀璧而去索隱云吳國東南有澹臺湖蓋其遺蹟焉唐贈江伯宋封金鄉侯一統志云墓在鄒縣西北三十里又開封府陳留縣北亦有滅明墓

原思

朱子曰原思孔子弟子名憲

元按弟子傳云原憲字子思鄭玄氏云魯人家語云宋人少孔子三十六歲唐贈原伯宋封任城侯公西華

朱子曰赤孔子弟子姓公西字子華不與輒大夫元按弟子傳云公西赤字子華少孔子四十二歲

鄭玄氏云魯人子貢曰齊莊而能肅志通而好禮
擯相兩君之事篤雅有節是公西赤之行也唐贈
申郃伯宋封鉅野侯

漆雕開云墓在曲阜西黃三里

朱子曰漆雕開孔子弟子字子若

元按弟子傳云漆雕開字子開家語云蔡人字子
若少孔子十一歲習尚書不樂仕鄭玄氏云魯人
唐贈滕伯宋封平輿侯

宰我

朱子曰宰我孔子弟子名子

論語類考 卷第六

三 湖海樓雕本

元按弟子傳云宰我字子我又云宰我爲臨淄大
夫與田常作亂以夷其族孔子恥之呂氏春秋亦
云陳恒攻宰子于庭然左傳無宰我與田常作亂
之文是時有闞止字子我而田闞爭寵子我爲田
常所殺豈闞止之字與宰我同而後人誤引耶鄭
玄氏云魯人唐贈齊侯宋封臨淄公改封齊公一
統志云墓在曲阜縣西南三里

申枏宋廷我理矣

朱子曰申枏弟子姓名

元按家語云申續字周而無申枏姓名鄭玄氏云

申棖卽申續也弟子傳云申黨字周邗曷氏云申續卽申黨也蓋魯人後漢王政云有善羊之潔無申黨之慾是以棖爲黨也然唐宋從祀則作二人故山東通志云申棖字子續非申黨也唐贈魯伯宋封文登侯前統志云封上蔡侯公

司馬牛

朱子曰司馬牛孔子弟子名犁向魋之弟

元按弟子傳云司馬耕字子牛孔安國氏云宋人春秋哀公十四年六月宋向魋自曹出奔衛宋向

巢來奔蓋向氏出於宋桓公之後又爲桓氏世爲

論語類考 卷第六

十四 湖海樓 雕本

宋司馬又爲司馬氏向魋兄弟五人左師向巢次

魋次子頎子車及牛不知牛與子頎等兄弟之次

左傳云初宋景公嬖向魋魋之寵害於公公將討之未及魋先謀公請享公焉以日中爲期私家甲

兵之備盡往享所公知之命皇野召左師巢與之

誓共攻魋子頎馳而告魋欲入攻公子車止之魋

遂入於曹以叛又使巢伐之曹人叛魋奔衛巢

奔魯司馬牛致其邑與珪而適齊後魋再奔齊牛

又致其邑而適吳吳人惡之而反趙簡子召之陳

成子亦召之卒於魯郭門之外阮氏葬諸邱輿唐

贈向伯宋封睢陽侯

巫馬期

朱子曰巫馬姓期字孔子弟子名施

元按弟子傳云巫馬施字子旗少孔子三十歲鄭
玄氏云魯人或云陳人期與子路薪於韞邱見富
人處師氏而心無所慕及爲單父宰戴星而出戴
星而入身親其勞而治唐贈鄩伯宋封東阿侯

柴

朱子曰柴孔子弟子姓高字子羔

元按弟子傳云高柴字子羔齊人敬仲俟十代孫

論語類考 卷第六

十五

湖海樓藏本

也少孔子三十歲子羔長不盈五尺受業孔子孔
子以爲愚鄭玄氏云子羔衛人左傳作子羔而家
語則作子高禮記又作子臯唐贈其伯宋封其城
侯一統志云墓在沂州西南一百三十里又開封
府太康縣西亦有柴墓

牢

朱子曰牢孔子弟子姓琴字子開亦字子張

元按琴牢衛人也家語載之而史記弟子傳不載

莊子謂琴張與子桑戶孟之反三人爲友唐贈南

陵伯宋封平陽侯

孺悲

朱子曰孺悲魯人嘗學士喪禮於孔子

元按禮記雜記云恤由之喪哀公使孺悲之孔子學士喪禮士喪禮於是乎書註云時人僭上士之喪禮喪禮已廢孔子以教孺悲國人乃復書而存之是孺悲蓋孔子弟子也而史記家語皆不入弟子之列故朱子止稱魯人而不稱弟子豈因孔子辭以疾而絕之耶然歌瑟使聞則固未嘗深絕之其視鳴鼓攻求者何如而孺悲獨不以弟子稱何也

陳亢

朱子曰子禽姓陳名亢孔子弟子或曰亢子貢弟子未知孰是

元按陳亢陳人也家語收在孔子弟子篇中而史記弟子傳不載焉今考論語子禽兩問子貢一問伯魚無請問孔子之事其謂子貢過恭於仲尼蓋推尊其師也稱子貢爲子稱孔子爲仲尼他無此例以此推之當爲子貢弟子無疑宋封南頓侯一統志云墓在開封府太康縣北

互鄉童子 闕黨童子

元按互鄉童子孔子與其進闕黨童子孔子使之將命是皆得事孔子者但姓名俱無考耳

論語類考卷第六終

論語類考 卷第六

十七 湖海樓雕本



淵命是皆得事孔子與其進闕黨童子孔子使之

將命是皆得事孔子者但姓名俱無考耳

論語類考卷第七

應城陳士元著

蕭山陳春校

人物考 第二 目二十六

堯

元按史記五帝本紀惟云帝堯不書姓氏索隱云
姓伊祁氏然伊祁乃炎帝之姓蓋以堯與炎帝俱
火德王故謂堯爲炎帝後而漢書遂以堯爲炎帝
子姓伊祁謬矣世紀云慶都寄居於伊長孺家故
堯從母所居爲姓靈臺碑云昔者慶都氏姓曰伊
則伊其母姓豈得爲堯姓乎路史云帝堯姬姓帝
嚳之第二子也母陳豐氏曰慶都生堯於丹陵是
曰放勳年十有三佐摯封殖受封於陶又改封於
唐年十六以唐侯踐帝曰陶唐氏都於平陽安邑
以火紀德在位七十載欲遜位於是四嶽舉舜又
三載堯已八十九歲薦舜於天以攝事一百載堯
乃殂落壽一百十六歲春秋元命苞云堯眉八采
是謂通明尚書中候云帝堯卽政榮光出河龍馬
銜甲世紀云堯二十登帝位廚生翼脯階生蓂莢
在位九十八年壽一百十八歲後世稱爲堯云夫

堯乃陶唐氏之名而索隱則以堯舜禹爲諡然堯

曰咨汝舜舜曰咨汝禹汝棄汝契若以爲謚則棄契垂益夔龍皆謚乎孟子云放勳乃殂落屈原云就重華而陳辭故路史又以堯名放勳舜名重華夫放勳者總名帝堯德業之大也重華者帝舜重堯之華也豈可以爲堯舜之名號乎鄭立氏云堯遊城陽而死葬焉外紀云堯葬於穀林子十人長曰監明先死監明之子式封於劉其後有劉累事存漢紀堯娶富宜氏生朱朱傲使出就丹堯崩舜封朱於房爲房侯謂之虞賓夏后封之唐朱之庶弟九傳鑄冀郁櫟函高唐上唐唐社皆其後也而御龍豕韋范隨士劉之姓見左傳

舜

元按帝舜有虞氏姚姓其先國於虞爲虞姓王符

氏姓志云舜姓虞而史伯亦稱虞幕則其上世爲

虞矣書云有鰥在下曰虞舜則虞舜微時止姓虞

而名舜可知史記云舜祖句望出於顓頊非也子

嘗著荒史有辨矣風俗通云舜祖幕左傳云舜祭

幕路史云虞幕生喬牛喬牛生瞽叟是虞幕爲舜

祖而舜姓虞也綱目前編云堯卽位四十有一載

甲申舜生於諸馮索隱云舜母曰握登蘇氏古史

云舜生於諸馮之姚墟故爲姚姓居於瀋汭故爲
媯姓金履祥氏云諸馮瀋汭皆在今河東縣孟子
以舜生諸馮爲東夷之人蓋對文王西夷而言猶
云東方西方耳故曰地之相去千有餘里蓋自河
中至岐周千餘里也而說者指齊之歷山濮之雷
夏爲舜耕漁之地或又指會稽上虞牛羊村百官
渡爲舜所居其謬殊甚舜本虞帝之名一徙成市
再徙成都萬章云謀蓋都君而皇甫謐遂以都君
爲舜之字路史云目瞳重曜故曰舜而字曰重華
也世紀云因瞳子名重華春秋演孔圖云舜目四

論語類考 卷第七

三 湖海樓藏本

瞳謂之重明尸子與淮南子皆云舜兩瞳子是爲
重明羅莘氏云目動曰舜與瞬同諸說皆非也堯
舜禹字義古無定註廣雅云堯曉也鄭立氏禮記
註云舜充也玉篇云禹舒也或云堯遜也舜運也
禹舉也餘冬錄云舜准也循也禹輔也湯攘也又
諡法云翼善傳聖曰堯仁聖盛明曰舜受禪成功
曰禹此皆後人臆說耳舜年三十爲百揆三十三
攝天子事六十而堯崩服堯三年喪卽天子位在
位四十八載而崩於鳴條壽一百十歲三妃娥皇
盲無子女英生義均及季釐義均封于商是爲商

均季釐封於緡次妃癸比氏生二女曰宵明曰燭
光是爲湘神庶子七人而圭胡負遂盧蒲衛甄潘
饒番傳鄒息其何母轅餘姚上虞濮陽餘虞西虞
無錫巴陵衡山長沙皆其裔也

禹

元按夏后姒姓名禹一曰伯禹又曰大禹索隱以
禹爲謚史記以文命爲名或又以文命爲字薛應
旂氏云禹字高密蓋據世紀之說皆非也前已辨
矣路史云禹之先出於顓頊顓頊生駱明駱明生
白馬是爲伯翳字熙汶山廣柔人也封于崇故曰

論語類考 卷第七

四 湖海樓雕本

崇伯舜遇之羽山三年而死初翳納有莘氏曰志
是爲修己生禹於熒道之石紐鄉長於西羌西夷
之人也三十娶塗山氏綱目前編云堯在位七十
有二載乙卯舜使禹平水土八十有一載甲子封
於有夏舜在位三十有二載丁巳命禹總師戊午
敘洪範九疇四十有八載甲戌舜崩乙亥禹避於
陽城丙子禹卽位在位八歲崩於會稽年百有六
歲以金紀德故又稱白帝禮緯含文嘉云禹卑宮
室垂意於溝洫百穀用成神龍至靈龜服尚書璇
璣鈴云禹開龍門導積石立圭出刻曰延喜鬻子

云禹飯一饋而七起世紀云禹手足胼胝故世傳禹病偏枯足不相過至今巫稱禹步焉禹廟諡議云禹桀皆後世易名周人革民視聽故以行爲諡乃諡夏之末王爲桀而追諡其始祖爲禹也豈其然哉

稷

元按稷名棄周本紀云其母有邠氏女曰姜嫄爲帝嚳元妃姜嫄出野見巨人跡踐之有孕居期生子以爲不祥棄之隘巷林中寒冰皆有異遂收養焉初欲棄之因名曰棄及爲成人好耕農堯舉爲農師天下得其利舜封之於邠號曰后稷別姓姬氏路史云棄字曰庚辰勤百穀而死于黑水之山娶姁生稷璽世爲后稷周禮大司徒註云棄爲堯稷官立稼穡死配稷名爲田正詩人謂之田祖履跡之異則前賢辨之悉矣

臯陶

元按路史云少昊之裔子取顓頊氏之女曰修生大業大業取少典氏之女曰華生陶陶生而馬喙漁於雷澤帝舜以爲士師陶一振褐而不仁者遠乃立犴獄造科律聽獄執中而天下無冤封之於

臯是曰臯陶舜禪禹禹遜之陶辭焉卒於臯寰宇
記云六安北有臯陶冢夏本紀云帝禹立而舉臯
陶薦之且授政焉而臯陶卒封臯陶之後於英六
或在許又左傳文公五年秋楚仲歸滅六冬公子
變滅蓼臧文仲曰臯陶庭堅不祀杜預氏註云臯
陶字庭堅羅泌氏云臯陶乃少昊之後而庭堅則
高辛氏之子六乃臯陶之後而蓼則庭堅之後也
預既誤以庭堅爲臯陶字復以蓼爲臯陶後失之
矣蓋臯陶之後有舒蓼而非蓼也舒蓼偃姓而蓼
則姬姓蓼滅而舒蓼猶存至宣公八年舒蓼始滅
臯陶之裔世爲理官其後逃難伊墟爲李氏是爲
明之祖

舜臣五人

朱子曰五人禹稷契臯陶伯益

元按舜有臣五人禹稷臯陶三人解見於前茲考
契益二人路史云契帝嚳之子帝嚳次妃有娥氏
曰簡狄感鳧致胎醜而生契聰明而仁堯命爲司
徒使布五教封於商賜姓子氏商人謂之立王詩
稱天命立鳥降而生商毛傳以馭降爲祀郊禘之
候而史遷乃有吞踐之說蘇洵氏辨之詳矣至於

伯益之世系則史傳不同路史云顓頊娶鄒屠氏
生禹之祖及八凱伯益八凱之一也字墮歆爲唐
澤虞是爲百蟲將軍佐禹治水封於梁舜禪禹禹
遜於益辭焉年過二百歲史記秦本紀云帝顓頊
之裔孫曰女修生子大業大業娶少典之子曰女
華生大費與禹平水土已成禹曰非子能成亦大
費爲輔帝曰咨爾費贊禹功其賜爾阜旂爾後嗣
將大出乃妻以姚女佐禹調鳥獸鳥獸馴服是爲
伯翳賜姓嬴氏索隱云此秦趙之祖一名柏翳尚
書謂之益世本漢書謂之伯益觀史記上下諸文
柏翳與伯益是一人無疑羅泌氏則云柏翳者少
昊之後皐陶之子而伯益乃顓頊之第三子劉秀
表亦云夏禹治水伯益與柏翳主驅禽獸是翳益
爲二人金履祥氏云秦紀謂柏翳佐禹治水馴服
鳥獸卽尚書所謂隨山刊木暨益奏庶鮮食益作
朕虞若子上下鳥獸者也唐虞功臣獨四岳不名
其餘未有無名者豈有柏翳之功如此而尚書不
概見乎泌之好異要非事實也

羿

朱子曰羿有窮之君善射

羅泌氏曰夷羿有窮氏窮國之侯也偃姓左臂修而善射五歲得法於山中傳楚狐父之道又學射於吉甫以善射著嘗從吳賀北游見雀焉賀命射左目羿中厥右恥之由是每進妙中高出天下迨事夏王夏太康消淫無度畋於有洛之表十旬不反羿因民弗忍兵於河以距之太康失邦仲康立於時羲和沈湎于酒叛官離次將羿是與王命胤侯征之羿遽隱慝及相之立爰逐相而自立因夏民代夏政自鉏遷於窮石滅樂正后夔之子伯封於是益恃射不修民事而蔽於從禽武羅伯因熊髡龐圍皆賢臣也乃棄之而信任伯明氏之讒子寒浞又以龐門爲受教之臣浞乃蒸取羿室純狐謀殺羿而虞羿於畋羿弗察也八年歸自畋龐門取桃楸殺之

元按尚書稱太康尸位乃盤游無度畋于有洛之表十旬弗反有窮后羿因民弗忍距於河窮國名也羿居窮石之地故以窮爲國號孔安國註尚書云羿諸侯名杜預註左傳云羿有窮君之號又說文云羿帝嚳射官也賈逵云羿之先祖世爲先王射官故帝嚳賜羿弓矢使司射又堯之臣有羿亦

善射是羿乃善射之稱非人名也左傳襄公四年
魏絳云昔有夏之方衰也后羿自鉏遷於窮石因
夏民以代夏政註云禹孫太康淫於失國夏人立
其弟仲康仲康卒子相立羿遂伐相號曰有窮孔
穎達云羿廢太康而立其弟仲康及后相既立羿
代夏政則羿必自立爲天子逐出后相后相依斟
灌斟尋夏祚未滅蓋與羿並稱王也及寒浞殺羿
因羿室而生澆澆已長自能用兵始滅后相相死
之後始生少康少康生杼杼又年長能誘豷始得
滅浞而立少康自太康失邦至少康紹國當有百
載據此則夏亂甚矣而夏本紀云仲康崩子相立
相崩子少康立不言羿浞之事是遷之疏也

稟

朱子曰稟春秋傳作澆浞之子也後爲夏少康所

誅

羅泌氏曰寒浞者猗姓寒君伯明氏之讒子弟也
寒君惡之棄諸窮窮羿收之立以爲相而信使之
羿逐后相自立而荒遊浞乃蒸羿室已而殺羿襲
其號且因其室生澆及豷澆惟恃力盪舟走陸是
曰稟浞任詐僞而不德於民使澆帥師滅斟灌斟

尋氏處澆於過處豷於戈弑夏后相爰革夏命四十有三年爲伯靡所殺

元按左傳魏絳云浞因羿室生澆及豷恃其讒慝詐僞而不德於民使澆用師滅斟灌及斟尋氏處澆於過處豷於戈夏臣靡自有鬲氏收二國之燼以滅浞而立少康少康滅澆於過后杼滅豷於戈有窮遂亡又哀公元年伍員云昔有過澆殺斟灌以伐斟尋滅夏后相后緡方娠逃出自竇歸於有仍生少康焉爲仍之牧正慧澆能戒之澆使其臣椒求之逃奔有虞爲之庖正以脫其害虞思妻以

論語類考 卷第七

十 湖海樓藏本

二姚邑諸綸有田一成有衆一旅能布其德而兆其謀以收夏衆撫其官職於是少康使其臣女艾諜澆使其子季杼誘豷遂滅過戈復禹之績祀夏配天不失舊物夫澆與豷皆浞之子澆國於過豷國於戈而澆獨以力稱屈原云澆身被服疆圉是也

湯

元按商湯子姓契之後商本紀云天乙立是爲成湯自契至湯十四代凡八遷湯始居亳放桀於南巢歸於亳踐天子位號曰商自盤庚遷殷張晏云

禹湯皆字也諡法云除殘去虐曰湯然湯名履書云予小子履是也孔安國云湯初名天乙爲王時改名履譙周云夏殷之禮生稱王死稱廟主皆以帝名配之天亦帝也殷人尊湯故曰天乙又易曰帝乙歸妹易傳亦以帝乙爲湯名是天乙卽帝乙也若然紂之父亦曰帝乙是祖孫同名矣商王多以十干取名湯之父曰主癸主癸之父曰主壬主壬之父曰報丙報丙之父曰報乙湯之後王又有祖乙有小乙有武乙然則帝乙爲湯名豈待後世稱廟主而始有帝乙之名哉又湯亦稱武王詩云

論語類考 卷第七

十 湖海樓雕本

武王載旆毛傳云武王湯也又尚書璇璣鈴云湯受金符帝籙白狼銜鉤世紀云湯有聖德諸侯不義者湯從而征之一時歸者三十六國踐位三十三年壽百歲卒葬亳北之濟陰

伊尹

朱氏曰伊尹湯之相也

元按呂氏春秋云有佻氏女採得嬰兒於空桑後居伊水命曰伊尹尹正也謂湯使之正天下也皇甫謐氏云伊尹力牧之後生於空桑空桑地名史記云伊尹名阿衡阿衡欲干湯而無由乃爲有莘

駿臣負鼎俎以滋味說湯致於王道或云伊尹從湯言素王及九主之事今觀尚書所載尹豈有是哉竹書紀年云伊尹壽百二十歲路史云伊姓出於炎帝下及湯代有伊摯爲之左相是爲保衡孫子兵書伊尹名摯孔安國氏亦云伊摯而國名紀又有伊國註云伊摯所封也則伊又爲地名而非姓矣英賢傳以伊尹爲空桑氏尤妄外紀太乙氏之後有空桑氏然空桑之地有二其一在兗于寶記云微在生孔子於空桑之地孔廟禮器碑云顏育空桑是也其一在莘陝之間共工氏振洪水以薄空桑伊尹生於空桑是也故地記謂陳留有伊尹村伊尹卒大霧三日至太戊時其子伊陟爲相一統志云伊尹墓在開封府歸德州城東南四十里又河南府偃師縣西亦有伊尹墓

高宗

孔安國氏曰高宗殷之中興王武丁也

而國名

元按商本紀云帝武丁帝小乙之子也武丁修政行德殷道復興在位五十九祀武丁崩子祖庚嗣立武丁之廟爲高宗作殷武樂章以頌之禮記喪服四制云高宗者武丁武丁者殷之賢王也繼世

卽位而慙良於喪當此之時殷衰而復興禮廢而復起故善之善之故載之書中而高之故謂之高

宗

老彭

包咸氏曰老彭殷賢大夫

元按邢昺氏云老彭卽莊子所謂彭祖上及有虞下及五霸者也李善氏云彭祖名鏗堯臣封於彭城歷虞夏至商年七百歲故以久壽稱世本云彭祖姓鏗名鏗在商爲守藏吏在周爲柱下史年八百歲又宰我問五帝德篇云堯舉舜彭祖而任之

論語類考 卷第七

三 詞海樓藏本

崔靈恩氏云彭祖堯臣任殷世其人壽七百年王符氏潛夫論云顓帝師於老彭壽千餘歲此皆以

老彭爲一人也王弼氏云老是老聃彭是彭祖羅

泌氏云祝融之裔陸終之子曰鏗字鏗封於彭是

爲彭祖以斟雉養性事放勳歷夏商守官大夫商

王采女受術籙始去之終身不見壽七百六十七

歲臯陶之裔恩成之胄世爲理官以理命氏至紂

時逃難伊墟爲李氏其五世孫名乾字元臬爲周

上御史胎則且眇娶洪氏曰嬰敷感飛星娠十二

年誕左而生儋周宣王之四十二年二月望日也

儋之始生其母名之曰玄祿是爲伯陽甫生而皓首故謂老子耳七十而參漏故名耳而字儋儋與聃同左傳所謂太史儋是也邑於苦之賴鄉賴卽萊也故又曰老萊子以三十六法治心理性究忠盡孝桓莊世柱下史簡靈世守藏吏孔子嘗學禮焉孔沒十九年而儋入秦西歷流沙八十餘土化胡成佛壽四百有四十歲據其說則老彭爲二人孔子稱其述而不作信而好古彭祖雖無考而老子則有明證楊中立氏云老子五千言以自然爲宗謂之不作可也朱子亦云以曾子問中老聃言禮數段證之可見述而不作信而好古蓋聃周之史官掌國之典籍三皇五帝之書如五千言亦或古有是語而老聃傳之未可知也故列子引黃帝書與老子谷神不死章相同楊慎氏曰佛經三教論謂五千文者容成所說老爲尹談蓋述而不作也又莊子引容成氏曰除日無歲無外無內則容成氏固有書矣述而不作此其明證

周任

馬融氏曰古之良史

元按千姓編云周任商太史家語云晉人覘宋章

子曰周任有言曰民悅其愛者弗可敵又左傳昭公三年仲尼謂周任有言曰爲政者不賞私勞不罰私怨夫孔子屢引周任之格言則周任爲古之賢人可知路史亦云商有周任而邢昺氏乃以周任爲周大夫非是

紂

邢昺氏曰紂名辛字受商末世之王也

馮衍氏曰紂諡也殘義損善曰紂

元按尚書稱商王受史記殷本紀云帝乙崩子辛立是爲帝辛天下謂之紂紂資辨捷疾聞見甚敏

論語類考 卷第七

五 湖海樓雕本

才力過人手格猛獸又帝王世紀云紂倒曳九牛撫梁易柱而泰誓舉紂之罪更不言其絕力也曰沈湎冒色敢行暴虐曰穢德彰聞曰罪浮于桀又甚則稱之爲讎稱之爲獨夫今觀史鑑所載淫虐之行天下之惡何加焉而子貢乃謂紂之不善不如是之甚何也竊疑周書之過其實也希寫有言文王拘羑里武王羈玉門呂氏春秋云季歷困死文王苦之不忘羑里之醜至武王事之亦不忘玉門之辱羅泌氏云文王見辱玉門顏色不變而武

王卒擒紂於牧野釋諒闇而卽戎載木主而示述

武王於紂蓋有怨辭焉豈謂泰誓耶孔子云武未盡善子貢云紂惡未甚其意將以儆戒於君臣之際而蘇氏遂以武王非聖人吁非所以論世矣

微子

朱子曰微子紂庶兄

元按微子啓家語及路史皆作魏子啓史記云微子開者殷帝乙首子而紂之庶兄也紂既立不明淫亂於政微子數諫不聽乃問於太師少師遂亡然尚書作微子啓而史記作微子開者避漢景帝諱也食采於微故曰微子呂氏春秋云紂母生微

論語類考 卷第七

六 湖海樓藏本

子與仲衍其時尚爲妾改而爲妻生紂紂父欲立微子啓爲太子太史據法而爭曰有妻之子不可立妾之子故立紂爲後史記云啓母賤辛母正后是二母也若謂啓辛同母則妻從夫貴而所生之子亦從而貴啓不得稱嫡長子乎此呂氏之謬也論語謂微子去之未嘗明言其何往而孔安國氏乃有奔周之說左傳又有面縛銜璧衰絰與襯之說史記又有持祭器造於軍門肉袒面縛膝行而前之說真厚誣微子也羅泌王柏金履祥輩皆有

辨矣一統志云墓在歸德州西南二十二里

箕子

朱子曰箕子紂諸父

元按宋世家云箕子紂親戚也紂爲淫泆箕子諫不聽乃被髮狎狂而爲奴遂隱而鼓琴以自悲是爲箕子操世家以箕子爲紂之親戚未嘗言其爲父爲兄鄭玄王肅皆言紂之諸父朱子集註從之而服虔杜預則又以爲紂之庶兄其說不同如此箕子名無考惟司馬彪註莊子云箕子名胥餘不知何據

比干

論語類考 卷第七

七 湖海樓雕本

朱子曰比干紂諸父

元按宋世家云王子比干者紂之親戚直言諫紂紂怒殺之刳其心家語亦云比干是紂之親而馬融以比干爲紂之諸父微子爲庶兄然孟子云以紂爲兄之子且以爲君而有微子啓王子比干是微子比干皆諸父矣夫孟子以微子比干並稱微子之爲紂庶兄確乎有明徵也而比干豈得爲諸父哉故金履祥謂孟子所謂兄之子者兄當作乙謂均是帝乙之子也言一時一家而善惡之相遠也若然則比干非紂諸父乃庶兄矣一統志云墓

在衛輝府城北一十里卽武王所封者題曰殷太師比干之墓又河南府偃師縣西北亦有比干墓

文王

元按文王姬姓名昌太王之孫季歷之子也上世出於后稷至公劉立國於豳亶父自豳遷岐改號曰周周本紀云季歷卒子昌立是爲西伯崇侯虎譖於紂囚之羑里乃演易闕天之徒求有莘氏美女及文馬以獻紂紂赦西伯賜弓矢斧鉞使專征伐於是伐犬戎伐密須而都於程又伐耆伐邶伐崇乃作豐邑遷都於豐年九十七而崩諡爲文王

論語類考 卷第七

大 湖海樓 雕本

史遷云西伯陰行善豈文王以服事殷之心哉

武王

元按武王名發西伯昌之子也昌娶於有莘氏曰太姒生十子長曰伯邑考早卒次日發發生於帝乙之二十三祀壬辰西伯薨子發嗣爲西伯乃伐紂踐天子位七年而崩墓在京兆長安東杜禮記文王世子篇文王謂武王曰我百爾九十吾與爾三焉文王九十七乃終武王九十三而終且如其言則文王十五而生武王前此已有伯邑考矣武王八十一而生成王後此又生唐叔虞焉此理所

無者蓋戴記之附會也竹書紀年云武王年五十四而卒似爲近理

周公

元按周文公名旦文王第三子武王之弟也采於周故稱周公文其諡也周在岐下國名紀云黃帝時有周昌商有周任是周國久矣自太王遷岐而竹書東漢書及孔叢子俱稱周公季歷是王季亦嘗稱周公也杜預氏云扶風雍東北有周城蓋卽周原岐之小地名而太王所遷之岐則在美陽之南故漢書及說文俱謂文王封岐在美陽中水鄉蓋卽周公之采邑故譙周氏云以太王所居之周地爲周公采邑是也周公長子伯禽成王封之魯次凡伯次伯齡封於蔣男爵次靖淵封於邢侯爵次祭伯事文王受商之命次胙次茅故路史云凡蔣邢茅胙祭皆周公之裔也史記云周公旣卒成王葬之於畢從文王明子小子不敢臣周公而一統志以周公墓在伯禽墓南似誤

亂臣十八

朱子曰馬氏以十人爲周公旦召公奭太公望畢公榮公太顛閎夭散宜生南宮适其一人謂文母

劉侍讀以爲子無臣母之義蓋邑姜也

元按尚書泰誓篇云予有亂臣十人同心同德孔安國註十人與馬融孔穎達鄭玄之說皆同故邢昺氏云十人自周公旦以下先儒相傳爲此說也君奭篇云惟文王尚克脩和有夏亦惟有若虢叔有若閔夭有若散宜生有若太顛有若南宮适註云虢叔文王之弟也至武王時虢叔死矣故十臣之中無虢叔也周公已解見於前召公名奭亦與周同姓譙周氏云周之支族食邑於召謂之召公索隱云召畿內采地文王受命取岐周故墟周召

論語類考 卷第七

子 湖海樓聯本

二地分爵二公故詩有周召二南言在岐山之陽也召公封於燕亦如周公以元子就封而自留以相王召公次子代爲召公至宣王時召康叔虎其後也世家云召公治西方甚得兆民和召公卒民思其政作甘棠之詩太公望呂尚也齊世家云呂尚東海上人其先祖嘗爲四嶽佐禹平水土有功虞夏之際封於呂本姓姜氏從其封姓故曰呂尚呂尚蓋嘗困窮年老矣釣於渭西伯將出獵十之曰所獲非龍非黿非虎非羆所獲霸王之輔於是西伯獵果遇太公於渭陽與語大悅曰自吾太公

望子久矣故號之曰太公望載與俱歸立爲師劉
向別錄云師之尚之父之故曰師尚父孫子兵法
云周之興也呂牙在殷譙周云姓姜名牙索隱云
名尚字牙師尚父其官名也武王已平商封師尚
父於齊營丘金石錄云太公壽一百四十歲畢公
名高馬融氏云畢公文王庶子姓書云畢公文王
少子魏世家云武王伐紂而高封於畢其苗裔曰
畢萬乃魏之祖也杜預氏云畢在長安縣西北括
地志云畢原在雍州萬年縣西南周本紀云武王
命畢公釋百姓之囚表商容之間路史云周公薨

論語類考 卷第七

主 湖海樓藏本

畢公高入職焉蓋高食采於畢入爲天子公卿也
畢命篇云命畢公保釐東郊又云以周公之事往
哉又稱爲父師是畢公代周公父師之職治陝以
東之郊也榮公名無考榮亦國名路史以榮爲姬
姓之國蓋亦食采于榮而入爲公卿者厲王三十
年以榮公爲卿用事蓋其後也太顛闔天散宜生
夫閔散宜皆姓顛天生皆名周本紀云西伯文王
善養老太顛闔天散宜生鬻子辛甲之徒皆往歸
之又云紂囚西伯於羑里闔天之徒求有莘氏美
女驪戎之文馬以獻紂又云武王伐紂散宜生太

顛闔天皆執劔以衛武王又云武王命闔天封比
干之墓是也南宮适亦姓名卽八士之伯适周本
紀云武王命南宮适散鹿臺之財發鉅橋之粟國
語晉胥臣云文王之卽位度於闔天而謀於南宮
重之以周召畢榮韋昭註曰南宮卽南宮适也邑
姜武王妃太公呂望之女張師曾氏云邑姜亦婦
人之有聖德者

八士

元按馬融鄭玄皆以周之八士爲成王時人劉向
以爲宣王時人朱子集註兩存之且曰不可考矣

論語類考卷第七

主

湖海樓藏本

然以爲成王時人者近之汲冢周書克殷解云乃
命南宮忽振鹿臺之粟乃命南宮伯達與史佚遷
九鼎蓋南宮忽卽仲忽南宮伯達卽伯達尚書所
謂南宮适卽伯适也又宣和博古圖云武王時有
南宮仲蓋卽仲突仲忽也是八士者皆南宮氏也
國語云文王詢於八虞賈唐氏云周八士皆嘗爲
虞官又周書武寤解云尹氏八士太師三公咸作
有績又和寤解云王乃厲翼於尹氏八士註云八
士武王賢臣也唐蕭穎士遊蒙山詩云子尚捐俗
紛季隨躡遐軌丹鉛續錄云蒙山之季隨卽周八

士中一人也然季隨隱於蒙山事別無出雍大記
云八士墓在咸陽縣東北五十里

泰伯

朱子曰太王三子長泰伯次仲雍次季歷太王之
時商道寢衰而周日彊大季歷又生子昌有聖德
太王因有翦商之志而泰伯不從太王遂欲傳位
季歷以及昌泰伯知之乃與仲雍逃之荆蠻
羅泌氏曰古公太王避狄居岐娶於駘曰太姜生
泰伯仲雍季歷季歷居程古公屬焉泰伯窺知及
弟仲雍竄於荆蠻居梅里荆人義而君之號爲吳
泰伯伯卒仲繼剪髮文身倮以從俗是爲虞仲武
王封其曾孫仲於夏墟亦曰虞仲

論語類考 卷第七

三

湖海樓聯本

元按吳世家云季歷賢而有聖子昌太王欲立季
歷以及昌於是泰伯仲雍二人乃奔荆蠻以避季
歷季歷果立是爲王季而昌爲文王左傳僖公五
年宮之奇云泰伯不從是以不嗣故朱子亦云太
王翦商而泰伯不從若然則周爲強暴之諸侯取
商之計已非一世而文王以服事殷又何謂也詩
云居岐之陽實始翦商者蓋太王本無翦商之志
而居岐之時始得民心王業之成實基於此故詩

人追原武王之所以翦商其先業實始於太王耳
豈太王有翦商之志哉然泰伯所以必逃之荆蠻
者蓋泰伯爲長子序當傳國而太王或欲傳國於
季歷故泰伯逃以遜國也然孔子不曰三以國讓
而曰以天下讓者蓋泰伯逃之荆蠻從而歸者千
餘家立爲吳君則其賢可知使傳國位必能大其
世業況商之天下至紂必絕縱無武王伐之紂能
終有天下乎使泰伯不逃而有後焉則國位傳於
泰伯之後泰伯之後見紂無道亦必伐之不必武
王也是周之天下乃商之天下商之天下必歸於

論語類考 卷第七

五

語 湖海樓藏本

周乃泰伯之後之天下非季歷之後之天下也故
孔子論武王得天下乃追探爲泰伯所讓蓋人知
泰伯讓國而不知讓天下故曰無得而稱焉夫泰
伯與虞仲俱逃使仲雍不逃則國位亦當傳及仲
雍矣而孔子不稱仲雍爲至德惟以爲逸民者豈
讓國之心出於泰伯而仲雍從兄以逃於國位無
繫耶

虞仲

朱子曰虞仲卽仲雍與泰伯同竄荆蠻者

元按吳世家云泰伯弟仲雍皆周太王之子而季

歷之兄也季歷賢而有聖子昌太王欲立季歷以
及昌於是泰伯仲雍二人乃奔荆蠻爲吳泰伯卒
無子弟仲雍立是爲吳仲雍武王克殷求泰伯仲
雍之後封周章於吳封周章弟虞仲於周之北是
爲虞仲索隱云左傳稱泰伯虞仲太王之昭則虞
仲是太王之子而周章之弟亦稱虞仲者蓋周章
之弟字仲始封於虞故曰虞仲其仲雍本字仲而
爲吳之始祖後世亦稱虞仲所以祖與孫同號也

夷逸

元按先儒謂夷逸姓名無考或者以爲虞仲隱於

論語類考卷第七

五湖樓聯本

夷故稱虞仲夷逸金履祥云夷逸當自是一人但
不知姓名故號夷逸耳薛應旂云夷氏逸名夷詭
諸之裔也族人夷仲年爲齊大夫夷射姑爲邾大
夫獨逸隱居不仕或勸之逸曰吾譬則牛也寧服
輓以耕於野豈忍被繡入廟而爲犧乎是夷逸非
虞仲明矣

伯夷 叔齊

朱子曰伯夷叔齊孤竹君之二子

路史曰怡姜姓也禹有天下封怡以紹烈山是爲
默台成湯之初析封離支是爲孤竹西伯之興有

允及致老矣而歸之未至西伯薨武王急伐商叩
諫不及義棄周祿北之首陽上俛摩子難之逮聞
淑媛之言遂摘薇終焉是爲伯夷叔齊先是齊嫡
而夷長父初欲立夷不可初薨夷齊偕異去之北
海之瀕於是憑立世其國定王十一年入於齊
元按韓詩外傳云夷齊父名初字子朝孔叢子註
云夷齊墨台初之二子也允字公信智字公達是
叔齊名字不同又烈士傳云夷齊之弟憑字伯僚
然憑乃孤竹君之中子夷之弟非齊之弟也金履
祥氏云古無名字之例蓋緯書之附會耳宋元符
三年封伯夷爲清惠侯叔齊爲仁惠侯

論語類考卷第八

應城陳士元著

蕭山陳一春校

人物考

第三

目三十七

魯公

朱子曰魯公周公子伯禽也

元按索隱云周公元子就封於魯次子留相王室
邠代爲周公其餘食小國者六人樊蔣邢茅胙祭也
洛誥云予小子其退卽辟於周命公後是周公留
相成王成王封其子伯禽於魯也記云周公拜手
前魯公拜手後言受封告廟之禮耳陶淵明以爲
武王封之於魯誤也伯禽成王元年就封享國四
十六年一統志云魯公墓在兗州府曲阜縣東八

里

昭公

朱子曰昭公魯君名稠

元按魯世家云魯襄公卒太子子野立七月丙卒
魯人立稠爲君是爲昭公昭公年十九猶有童心
穆叔不欲立曰稠非適嗣且居喪不戚若果立必
爲季氏憂季武子弗聽卒立之昭公二十五年春
鷓鴣來巢師已曰文成之世童謠曰鷓鴣來巢公

在乾侯鸛鵠入處公在外野至二十八年昭公如
晉晉君果居昭公於乾侯昭公在當時有知禮之
名故陳司敗以爲問左傳云昭公五年公如晉自
郊勞至於贈賄無失禮晉侯謂女叔齊曰魯侯不
亦善於禮乎對曰是儀也不可謂禮禮所以定其
國行其政令無失其民者也今政在三家不能取
有子家羈弗能用也奸大國之盟陵虐小國公室
四分難將及身不恤其所禮之本末將於此乎在
而屑屑焉習其儀以亟言善於禮不亦遠乎三十
二年公薨明年夏叔孫成子逆公之喪於乾侯秋
七月葬昭公於墓道南孔子之爲司寇也溝而合
諸墓

吳孟子

許謙氏曰古者婦人皆以其姓在下而以孟仲之
次加於上如春秋所書仲子伯姬詩所謂孟姬之
類子宋姓姬魯姓姜齊姓伯仲長幼之序仲子宋
女伯姬魯女孟姜齊女也吳祖泰伯文王之伯父
魯祖周公文王之子吳魯無婚姻之禮昭公違禮
欲掩其惡故改姬稱子也

元按春秋哀公十二年夏五月甲辰孟子卒左傳

云昭公娶於吳故不書姓然先儒多以孟子爲昭公夫人考之經文未嘗稱爲夫人也惟坊記有云魯春秋去夫人之姓曰吳其死曰孟子卒故先儒遂以爲夫人不知坊記多出漢儒未足據也春秋書夫人姜氏至自齊之例孟子非夫人而亦書卒者魯史畏吳疆之故耳然則昭公犯娶同姓之非豈其得已也哉吳孟子卒孔子與弔適季氏季氏不綏放經而拜

定公

朱子曰定公魯君名宋

論語類考 卷第八

三 湖海樓藏本

元按定公名宋襄公之子昭公之弟也魯世家云昭公卒於乾侯魯人共立昭公弟宋爲君是爲定公綱目前編云季氏意如廢世子而立公子宋初公衍爲太子季孫使叔孫告於子家羈曰公衍公爲實使羣臣不得事君若公子宋主社稷則羣臣之願也昭公之喪至自乾侯甫及壞墮公子宋先入從者皆自壞墮反遂立宋爲君然昭公喪至五日而後定公卽位非常禮也昭公生務人及公衍二子從乾侯乃亦季氏之所忌不敢復入公子宋以昭公母弟雖亦從公在外然於季孫無忌子家

所謂貌而出者也故喪至壞墮而宋先入意如必欲抑使聽已不以時定位不過將以市已挾立之恩而魯之羣臣卒無一人倡明大義以獎公室使宋卒爲意如所制而不得有爲魯衰自是不振矣悲哉定公以敬王十一年卽位在位十五年薨於高寢

哀公

朱子曰哀公魯君名蔣

元按系本云哀公名蔣魯世家云名將定公之子周敬王二十六年卽位在位二十七年爲三桓所

論語類考 卷第八

四 湖海樓藏本

攻奔於衛孫於邾國人迎以歸卒於公孫有山氏哀公十四年春則春秋絕筆之年也哀公母曰定如先儒謂哀公四歲卽位然春秋哀公七年秋公伐邾若四歲卽位則伐邾之年方十歲耳何以能親將耶又魯君夫人多見於經而哀公夫人獨不經見蓋娶在先君之世薨在春秋絕筆之後也則公卽位時年已長矣四歲卽位之說似謬哀公子寧是爲悼公

孟莊子

朱子曰孟莊子魯大夫名速其父獻子名蔑

元按孟莊子仲孫速也仲孫蔑之子公孫敖之孫
公子慶父之曾孫也蔑卽孟獻子大學記其不以
利爲利以義爲利之言而孟子亦稱其有友五人
而忘家之善此誠魯之賢大夫而春秋中所僅見
者也歷相君五十年魯人謂之社稷之臣則其臣
必賢其政必善而孟莊子年少嗣立能不改焉故
孔門以爲難又考春秋莊子速之後有僖子獲懿
子何忌武伯彘皆能世其家法三家之中惟仲孫
氏獨忠公室而南宮敬叔之賢更出於流俗豈非
莊獻之遺教流風足以倡淑後裔哉夫仲孫氏又
稱孟孫者蓋魯桓公四子長莊公次慶父次公子
牙次公子友禮嫡長稱伯庶長稱孟莊公旣爲君
而大夫不敢宗諸侯不得與莊公爲伯仲叔季之
次故以慶父爲孟孫氏牙爲叔孫氏友爲季孫氏
是爲三家皆桓公之後故又爲三桓然慶父實莊
公之仲弟故國人猶稱仲孫而魯史因之也

孟懿子

朱子曰孟懿子魯大夫仲孫氏名忌

元按春秋定公六年仲孫何忌如晉左傳云孟懿
子往是知懿子名何忌也懿子之父僖子名獲僖

子將死召其大夫曰吾聞孔丘聖人之後也我若獲沒必屬說與何忌事之而學禮焉以定其位故孟懿子與南宮敬叔皆師事孔子

孟武伯

朱子曰武伯懿子之子名彘

元按春秋懿子以哀公十四年卒而武伯嗣哀公十七年左傳云公會齊侯於蒙孟武伯相武伯問於高柴曰諸侯盟誰執牛耳季羔曰鄆衍之役吳公子姑曹發陽之役衛石魋武伯曰然則彘也是知武伯爲懿子之子仲孫彘也

孟敬子

朱子曰孟敬子魯大夫仲孫氏名捷

元按檀弓云悼公之喪季昭子問於孟敬子鄭玄氏註云敬子武伯之子名捷是也

孟之反

朱子曰孟之反魯大夫名側

元按左傳哀公十一年齊師伐我戰於郊右師奔孟之側後入以爲殿杜預氏註云孟之側孟氏族也字反又莊周云孟子反夫孟側字反左傳以爲孟之側孔子以爲孟之反莊周以爲孟子反猶孟

子稱孟舍曰孟施舍也施之子皆助語辭如庾公之斯尹公之他之類

孟公綽

孔安國氏曰孟公綽魯大夫

元按孟公綽仲孫氏字公綽也能燭崔杼不臣史記弟子傳敘云孔子之所嚴事於魯孟公綽是也子服景伯

朱子曰子服氏景謚伯字魯大夫子服何也

元按子服氏孟氏之支庶也歷惠伯昭伯以至景

伯景伯名何左傳哀公七年公會吳於郟吳徵魯

論語類考 卷第八

七 湖海樓雜本

百牢景伯曰晉范鞅貪而棄禮以大國懼敝邑十
一牢之君若以禮命於諸侯則有數矣若亦棄禮
則有淫者矣吳人不聽景伯曰吳將亡矣不與必
棄疾於我乃與之十三年公會晉侯於黃池吳人
將以公見晉侯景伯對使者曰王合諸侯則伯帥
侯以見於王伯合諸侯則侯帥子男以見於伯自
王以下朝聘玉帛不同故敝邑之貢於吳有豐於
晉以爲伯也今以寡君見晉則晉爲伯矣吳人乃
止旣而悔之將囚景伯景伯曰何也立後於魯矣
遂囚以還及太宰嚭見於吳王曰無損於魯不如

歸之乃歸景伯景伯自言力能肆公伯寮於市朝則其勢位可知景伯名何而孔安國以爲名何忌非也

叔孫武叔

朱子曰武叔魯大夫名州仇

元按武叔叔孫成子之子也成子名不敢左傳定公八年陽虎劫武叔以伐孟氏哀公十一年齊師伐魯及清武叔呼冉有而問戰武叔之母死旣小斂袒且投冠拔髮子游曰知禮君子曰州仇焉知禮所事者禮之末節也

季文子

朱子曰季文子魯大夫名行父

元按季文子季友之孫爲魯大夫史記世家云成公十六年宣伯使告晉卻犇請止季文子而殺之九月晉人執季文子於茗丘范文子謂欒武子曰季孫於魯相二君矣妾不衣帛馬不食粟可不謂忠乎信讒慝而棄忠良若諸侯何乃赦季文子十二月季文子及卻犇盟於扈歸刺公子偃襄公五年季文子卒大夫入斂公在位宰庀家器爲葬備春秋私考云季孫行父奸深忌刻之人也論語謂

其三思而後行豈非用智之深而謀身之密者耶
觀其黨仲遂之弑適傾歸父之用事而又結晉仇
齊以專魯國之政可知矣左遷稱其妾不衣帛馬
不食粟相三君而無私積全與行父平生不類雖
有之亦飾詐沽名之事耳但其末年能信用仲孫
蔑而委之政故猶以功名終焉

季桓子

朱子曰季桓子魯大夫名斯

元按左傳季桓子季平子之子也平子名意如定
公五年六月季孫意如卒子斯嗣是爲桓子桓子

論語類考 卷第八

九 湖海樓雕本

行東野及費子洩爲費宰逆勞於郊桓子敬之勞
仲梁懷仲梁懷弗敬子洩怒謂陽虎曰子行之乎
陽虎囚桓子而逐仲梁懷旣而盟桓子於稷門之
內而釋之定公六年桓子如晉獻鄭俘七年齊伐
魯桓子與孟懿子禦之十二年仲由爲宰將墮三
都於是桓子帥師墮費十三年齊人饋女樂桓子
微服往觀語定公受之怠於政孔子去適衛哀公
二年桓子伐邾將伐絞三年秋桓子有疾謂康子
曰昔者孔子幾興魯矣以吾受羣婢故去我死汝
相魯必召仲尼後數日死

季康子

朱子曰季康子魯大夫季孫氏名肥

元按季孫肥之名見於左傳及魯世家乃桓子之庶子哀公三年秋季桓子有疾命正常曰南孺子之子男也則以告而立之女也則肥也可南孺子者桓子之妻也桓子卒康子立既葬康子在朝南氏生男正常載以如朝告曰夫子有遺言命其圉臣曰南氏生男則以告於君與大夫而立之今生矣男也敢告遂奔衛康子請退公使大夫共劉視之則或殺之矣乃討之召正常正常不反畏康子也康子立欲召仲尼公之魚曰昔吾先君用之不能終爲諸侯笑今又用之不能終是再爲諸侯笑康子曰誰召而可曰必召冉求於是使召冉求論語所謂季氏旅泰山伐顓臾冉求聚斂事皆康子時事也諡法安樂撫民曰康

季子然

朱子曰子然季氏子弟

元按註疏孔安國邢昺皆以子然爲季氏子弟子然蓋其諡也其名與事實無考薛應旂謂子然平子意如之子桓子之弟也不知何據或亦因其與

孔子同時而臆度之耳

鄒人

邢昺氏曰鄒人魯鄒邑大夫公季子

元按孔子父叔梁大夫紇有九女無子其妾生孟

皮一字伯尼有足病於是求婚於顏氏顏氏生三

女其小曰徵在顏父問三女曰鄒大夫雖父祖爲

卿士然其先聖王之裔今其人身長十尺武力絕

倫雖年長性嚴不足爲疑三子孰能爲之妻徵在

進曰從父所制將何問焉父曰卽爾能矣遂以妻

之乃生孔子春秋於邑大夫多稱人人之者微之

論語類考卷第八

十一 渤海樓雕本

也故不以姓名見如文公九年經稱許人左傳則

稱大夫是也又左傳襄公十年縣門發鄒人紇抉

之以出在內者則當時嘗以鄒人稱孔子之父矣

宋祥符年封紇爲齊國公元至順年加封啓聖王

臧文仲

朱子曰臧文仲魯大夫臧孫氏名辰

元按世本云魯孝公生僖伯彊彊生哀伯達達生

伯氏瓶瓶生文仲辰則辰乃公子彊之曾孫也彊

字子臧辰以王父字爲氏故曰臧孫氏文仲繼然

友爲政自莊公末及其聞國政矣而四十餘年魯

政多疵至於文公尤甚文公十年三月辛卯文仲卒當時稱其爲名大夫而孔子以爲不智又以爲竊位其衆好必察者與

臧武仲

朱子曰魯大夫名紇

元按臧武仲名紇諡武仲文仲之孫宣叔之子也左傳襄公二十二年臧武仲如晉雨過御叔御叔曰焉用聖人註云武仲多智時人謂之聖也襄公二十三年臧孫紇出奔邾初季武子無適子庶子公鉏居長而武子愛幼子紇欲立之臧孫紇成之

論語類考 卷第八

三 湖海樓藏本

是爲季悼子於是季孫愛臧孫孟孫惡之其後季孫以孟氏計攻臧氏臧孫斬鹿門之鬪以出奔邾初臧宣叔娶於鑄生賈及爲又娶穆姜之姨子爲繼室生紇長於公宮姜氏愛而立之臧賈臧爲出在鑄臧武仲自邾使告臧賈且致大蔡曰子以大蔡請納其可賈再拜受龜使爲以納請臧孫如防使告魯曰紇非能害也知不足也非敢私請苟守先祀無廢二勳敢不辟邑乃立臧爲此孔子所爲要君者也臧紇致防而奔齊仲尼曰知之難也有臧武仲之知而不容於魯國作不順而施不恕也

陽貨

朱子曰陽貨季氏家臣名虎嘗囚季桓子而專國政

元按左傳陽貨初事季平子至定公五年九月四季桓子及公父文伯而逐仲梁懷冬十月殺公何藐盟桓子於稷門之內逐公父文伯及秦盭皆奔齊六年夏強使孟懿子往報晉夫人之幣八月又盟公及三桓於周社盟國人於亳社詛於五父之衢八年九月劫公與武叔以伐孟氏公斂處父戰於棘下陽貨敗陽虎說甲如公宮取寶玉大弓以出舍於五父之衢入於謹陽關以叛九年夏歸魯寶玉大弓魯人伐陽關陽虎使焚萊門而出奔齊齊侯執之囚諸西鄙乃載蔥靈寢於其中而逃奔晉適趙氏孔子曰趙氏其世有亂乎子路曰權不在焉豈能爲亂孔子曰陽虎親富而不親仁趙簡子好利而多信必溺其說而從其謀禍敗所終非一世可知也

陽膚

朱子曰陽膚曾子弟子

元按一統志云陽膚武城人曾子弟子七人陽膚

其一也

微生高

朱子曰微生姓高名魯人素有直名者

元按莊子及戰國策尾生與女子期於梁下女子不來水至不去抱梁柱而死程復心氏云尾生一本作微生戰國策作尾生高高誘氏以爲魯人疑卽微生高也觀此則其爲人概可見矣

微生畝

朱子曰微生姓畝名也

元按微生畝蓋微生高之族也高之直畝之固豈

聖人中正之道哉

左丘明

程子曰左丘明古之聞人也

元按漢書藝文志云左丘明魯太史吳程氏云自班馬以來皆謂左丘明卽傳春秋撰國語者故孔安國註論語以爲魯太史也或謂傳春秋者非左丘明乃楚之左史倚相薛應旂氏又以左丘明爲左史倚相之後杜預氏左傳序云左丘明受經於仲尼然孔子稱左丘明之所恥曰丘亦恥之則左丘明當是孔子之先輩今左傳序事於孔子旣沒

之後至於韓趙魏滅智伯之時則傳春秋者似非左丘明矣左丘氏明名故史記或稱左丘然自漢以來率稱左氏而杜預乃云仲尼素王丘明素臣鄭夾漈氏族志亦云左姓丘明名宋封爲中都伯一統志云墓在濟南府肥城縣西南二十五里

公伯寮

朱子曰公伯寮魯人

元按史記弟子傳云公伯寮字子周張守節氏云家語弟子篇有申寮字子周卽公伯寮也古史考則謂公伯寮是讒愬之人孔子不責而云命非弟子流也故朱子集註不云弟子

論語類考 卷第八

五

湖海樓藏本

柳下惠

朱子曰柳下惠魯大夫展獲字禽食邑柳下諡曰惠

元按莊子云孔子與柳下季爲友柳下季之弟名曰盜跖註云柳下惠姓展名獲字季禽一云字子禽魯公族展無駭之子也然考之左傳展禽在魯僖公時至孔子之生八十餘年孔子豈得相與爲友蓋莊子寓言也僖公二十六年齊侵魯僖公使展禽弟展喜犒師喜受命於禽以往諭以先王之

命齊師媿服齊求魯岑鼎魯與之贖展禽不肯失
信乃以眞岑鼎往臧文仲祀爰居展禽非之文仲
曰季子之言不可不法也使書之以爲三筮夏父
弗忌躋僖公於閔公上展禽曰必有殃矣列女傳
云柳下惠旣死門人將誄之妻曰夫子之謚宜爲
惠兮門人從之以爲誄

卞莊子

朱子曰莊子卞邑大夫

元按國名紀云卞和卞莊子皆以卞邑爲姓氏族
大全云曹叔振鐸之後支庶食采於卞因以爲氏

論語類考 卷第八

去 湖海樓雕本

卞莊子是也集註以爲卞邑大夫則本於晉儒周
生烈之說史記傳云陳軫傳云卞莊子有刺雙虎
之功荀子云齊人伐魯忌卞莊子不敢過卞劉向
新序云莊子養母戰而三北及母死齊伐魯莊子
赴敵三獲甲首以獻曰此塞三北遂赴齊師殺卞
人而死據此則莊子爲卞人固未嘗言其爲大夫
及卞姓也一統志云墓在東昌府聊城縣界內

林放

朱子曰林放魯人

元按禮殿圖有林放名而弟子傳不載故集註止

云魯人唐贈清河伯宋封長山侯

子桑伯子

朱子曰子桑伯子魯人

元按邢昺云子桑伯子當是一人故王肅包咸惟言伯子而已鄭玄云子桑秦大夫蓋以左傳秦有公孫枝字子桑也鄭玄引之謬矣集註所謂子桑戶者蓋以莊周稱子桑戶孟子反子琴張三人相與友其言皆大簡之意子桑死孔子聞之使子貢往弔焉蓋子桑姓伯子字而戶其名也

原壤

朱子曰原壤孔子之故人

元按原壤蓋原憲之族周文王第十六子原伯之後也檀弓云孔子之故人曰原壤其母死夫子助之沐槨原壤登木而歌夫子爲弗聞也者而過之孔穎達氏云原壤方外之士離文棄本不拘禮節妄爲流宕蓋敗於名教誤於後學者也

公山弗擾

朱子曰弗擾季氏宰與陽虎共執桓子據邑以叛元按公山弗擾左傳作公山不狃字子洩蓋陽虎之黨也定公五年弗擾爲費宰其據費以叛召孔

子史記在定公九年孔子未爲中都宰前春秋不書者以費叛季氏非叛魯也而左傳家語及載在十二年是時定公尊用孔子而季孫斯仲孫何忌又從孔子墮費無費叛之事豈孔子舍魯而欲赴費人之召耶蓋史記九年費叛似是而左傳所謂費人襲魯仲尼命申句須樂頡下伐之妄矣春秋私考云季平子專權爲惡以陽虎爲腹心虎之預政已非朝夕及平子與叔孫成子相繼卒而桓子武叔皆稚弱國命遂爲虎所執公山弗擾爲費宰侯犯爲郈宰皆虎黨也弗擾以費叛犯以郈叛宜在定公五六年間桓子武叔初立之時虎專國政倚以爲助也何以知二邑之叛在此時耶蓋虎歸孔子蒸豚而曰大夫有賜於士弗擾叛欲召孔子則此時孔子尚未仕也孔子仕魯獵較爲兆必在定公七八年閒而不在桓子初立時也

達巷黨人

朱子曰其人姓名不傳

元按前漢書董仲舒傳云達巷黨人不學而自知

孟康子註云此項橐也氏族大全云項本姬姓春

秋時有項橐七歲而爲孔子師

冕 擊

元按周禮樂官有樂師大師小師其掌磬鐘笙鐃
鞀籥之官皆稱師師冕師擊如春秋師曠師箎師
慧之類擊本太師亦稱師擊如曠本太師亦稱師
曠也擊又名乙樂記所謂子貢見師乙而聞歌聲
是也擊冕姓皆無考

襄

朱子曰襄卽孔子所從學琴者

元按襄擊磬樂官之名史記世家云孔子學琴師
襄子十日不進師襄子曰可以益矣孔子曰丘已

論語類考 卷第八

十九 湖海樓雕本

習其曲矣未得其數也有閒曰已習其數可以益
矣孔子曰丘未得其志也有閒曰已習其志可以
益矣孔子曰丘未得其人也有閒曰有所穆然深
思焉有所怡然高望而遠志焉丘得其爲人黯然而
黑頽然而長眼如望羊奄有四方非文王其誰
能爲此也師襄子辟席再拜曰蓋文王操也襄姓
亦無考

干 繚 缺 方叔 武 陽

元按干繚缺方叔武陽皆樂官之名或曰方叔方
名而叔其字也姓皆無考其後子孫以官爲氏故

有亞飯氏三飯氏少師氏云

鄉原

朱子曰鄉原鄉人之愿者也

元按周生烈云鄉原者所至之鄉輒原其人情而爲意以待之也何晏云鄉向也謂其不能剛毅見人輒原其趨向而媚而合之也故孔子以爲德之賊其人姓名無考

此卷皆魯國人物

論語類考

卷第八

三

湖海樓雕本

丑卷皆魯國人物
鄉其人揆之無表

人辨其誠而合之也故孔子以爲德之
爲意以待之也何晏云鄉向也謂其不能剛毅見
示魁罔主原云鄉原者所至之鄉輒原其人情而
未平曰鄉原漢人之願者也

論語類考卷第九

應城陳士元著

蕭山陳春校

齊桓公

第四

目四十八

齊桓公

朱子曰齊桓公名小白

元按左傳小白齊僖公庶子也齊世家云僖公卒

太子諸兒立是爲襄公僖公同母弟夷仲之子曰

公孫無知弑襄公而自立爲齊君未幾爲雍林人

所殺初襄公無道羣弟恐禍及故次弟小白奔莒

鮑叔傅之次弟糾奔魯管仲召忽傅之大夫高傒

及雍林人殺無知議立君高國先陰召小白於莒

魯聞無知死亦發兵送公子糾而使管仲別將兵

遮莒道射中小白帶鉤小白佯死管仲使報魯魯

送糾者行益遲六日至齊則小白已入高傒立之

是爲桓公發兵距魯秋與魯戰於乾時魯敗走齊

絕魯歸道遺其書曰子糾兄弟弗忍誅請魯自殺

之召忽管仲讎也請得而甘心醢之不然將圍魯

魯人患之遂殺子糾於笙竇召忽自殺管仲請囚

以往鮑叔弔迎管仲及堂阜而脫桎梏桓公厚禮

以爲大夫任政桓公多內寵五公子皆求立桓公

病卒五公子爭立相攻桓公尸在牀六十七日尸
蟲出戶孝公元年八月始葬桓公

齊君

朱子曰齊君莊公名光

元按齊世家云靈公十年以公子光質晉十九年
立光爲太子高厚傅之靈公又嬖仲姬生子牙請
以爲太子公許之遂東徙太子光使高厚傅牙爲
太子靈公疾崔杼迎故太子光而立之是爲莊公
在位六年崔杼弑之晏嬰枕公尸而哭三踊而出
齊太史書曰崔杼弑莊公崔杼殺之其弟復書崔
杼復殺之少弟復書崔杼乃舍之

論語類考 卷第九

二 湖海樓藏本

齊景公

朱子曰齊景公名杵臼

元按齊世家云景公名杵臼莊公之異母弟也崔
杼弑莊公而立杵臼是爲景公景公嬖妾鬻姒生
子荼荼少其母賤無行諸大夫恐其爲嗣嘗以爲
言而景公乃計立荼爲太子逐羣公子於萊景公
卒陳乞作亂荼奔魯乞立景公之庶子陽生是爲
悼公而使人殺荼乞遂專政春秋私考云齊景公
亦賢君也當其始立卽用晏嬰故初年政治每有

可觀當時稱晏子以其君顯蓋有由也至於晚年
興兵結怨大異往時意晏子必已老不在位自會
夾谷之後或亦告終是景公之善惡繫於晏子之
存亡難以言自立矣

簡公

朱子曰簡公齊君名壬

元按齊世家云簡公名壬悼公陽生之子也初景
公卒太子荼立是爲晏孺子景公未葬而羣公子
畏誅出亡陳乞與鮑牧共立陽生是爲悼公使人
遷晏孺子於駘而殺之幕下後鮑牧弑悼公國人
立其子壬是爲簡公初簡公與父陽生俱在魯也
闕止有寵焉及卽位陳恆與闕爭寵因殺闕而弑
簡公年表乃以簡公爲景公之子誤矣

公子糾

程子曰桓公兄也子糾弟也使桓弟而糾兄管仲
所輔者正桓奪其國而殺之則管仲與桓不同世
之讎也若計其後功而與其事桓聖人之言無乃
害義之甚啓萬世不忠之亂乎

金履祥氏曰程子之說據漢世淮南王傳大約以
兄弟爲斷然荀卿杜預韋昭俱有桓公殺兄之說

但二者曲直不待兄弟而後明顧子糾名義已失
前無正君討賊之義後有抗君爭國之非桓公不
誅仲而用之仲安得而讎桓乎

元按春秋莊公九年夏公伐齊納糾九月齊人取
子糾殺之胡安國氏云前書納糾不稱子者明不
當立也後書殺糾復稱子者明不當殺也季本氏
云殺子糾稱齊人者糾欲篡兄倚魯爲亂國人之
所欲殺也糾不稱弟絕於族屬以罪討也是以子
糾爲弟也以子糾爲兄之說蓋倡於公穀故於桓
公之入曰篡曰不讓公子糾而荀卿之學出於公

論語類考 卷第九

四 湖海樓雕本

穀故曰桓公殺兄以爭國杜預氏因衍其說曰公
子糾桓公之庶兄也惟漢書薄昭諫淮南厲王有
曰齊桓殺其弟以反國故程子取此以證子糾之
爲弟考諸春秋經文書糾曰魯納糾書小白則曰
齊小白入於齊夫以小白繫之齊則小白當立而
糾之爲弟明矣惟程子以子糾爲弟然後有合於
聖人不許召忽之意而金履祥氏強爲之辨不論
兄弟之序豈不謬哉

召忽

元按召忽公子糾臣也忽死糾之難而春秋不書

者糾弟也桓公兄也桓公已立而忽乃納糾倚魯稱兵乾時決戰豈非欲危社稷之計乎此糾之所以得罪於齊而見殺也孔子比之匹夫匹婦自經溝瀆而莫之知也可以爲萬世之公案矣

管仲

朱子曰管仲齊大夫名夷吾相桓公霸諸侯

元按史記云管仲夷吾穎上人也少時嘗與鮑叔牙游鮑叔知其賢管仲貧困嘗欺鮑叔鮑叔終善遇之不以爲言已而鮑叔事齊公子小白管仲事

公子糾及小白立爲桓公公子糾死管仲囚焉鮑

論語類考 卷第九

五 湖海樓藏本

叔遂進管仲管仲旣用任政於齊齊桓公霸諸侯管仲之謀也著書五十八篇名曰管子仲卒子孫世祿於齊有封邑者十餘世一統志云管仲墓在牟山之阿

伯氏

孔安國氏曰伯氏齊大夫

元按伯氏名無考蓋齊之公族也先儒以其有駢邑三百故云齊大夫然能飯蔬食沒齒無怨言其亦安分悔過者矣

晏平仲

朱子曰晏平仲齊大夫名嬰

元按史記云晏平仲嬰萊之夷維人也索隱云晏子名嬰平諡仲字也山東通志云晏嬰字平仲齊公族爲大夫事齊靈公莊公景公以節儉力行顯名諸侯雖嘗爲相然知陳氏必有齊國乃聽季札之言納邑與政及其閒也從容諷議時有匡救焉平仲之父曰桓名弱其子名圉因圉乞作亂而奔魯一統志云晏嬰墓在臨淄縣東北三里

陳文子

朱子曰陳文子名須無

論語類考 卷第九

六 湖海樓藏本

元按左傳齊莊公三年秋晉大夫欒盈奔齊莊公厚待之晏嬰陳文子諫弗聽其後遂有崔杼之禍田完世家云陳完諡敬仲如齊改姓田氏完子穉孟夷穉孟夷生潛孟莊潛孟莊生文子須無事齊莊公文子生桓子無宇無宇生武子開與釐子乞乞事齊景公乞生子常是爲成子卽成恆也陳文子棄馬十乘事無考山東通志云齊有崔慶之亂自晏子而下能自守不污者惟文子爲賢

陳成子

朱子曰成子齊大夫名恆

元按陳恒史記作田常乞之子也乞卒恒代立是爲陳成子陳成子與闞止相齊簡公闞止字子我陳恒心害之闞有寵於簡公權弗能去於是陳恒復修釐子之政厚貸薄收齊人歌曰姬乎采芑歸乎陳成子齊大夫御鞅諫簡公曰陳闞不可並也君其擇焉不聽子我常舍公宮陳恒兄弟四人乘如公宮殺子我恐簡公誅已遂弑簡公

崔子

朱子曰崔武子齊大夫名杼

元按崔子杼齊公族也春秋襄公二十五年夏五

論語類考 卷第九

七 湖海樓藏本

月乙亥齊崔杼弑其君光史記世家云初棠公妻好棠公死崔杼取之莊公通之數如崔氏以崔杼冠賜人崔杼怒而不得閒莊公嘗笞宦者賈舉舉侍爲崔杼閒公以報怨五月莒子朝齊崔杼稱病不視事公問崔杼病遂從崔杼妻崔杼妻入室不出公擁柱而歌宦者賈舉遮公閉門崔杼之徒持兵從中起公登臺請解不許請盟不許請自殺於廟不許公踰牆射中公股反墜遂弑之崔杼立莊公異母弟杼自是爲景公崔杼爲右相慶封爲左相初崔杼生子成及彊其母死娶棠妻棠妻

東郭女也生子明東郭女使前夫棠公之子無咎
與其弟東郭偃相崔成成有罪二相急治之立明
爲太子成請老於崔杼崔杼許之二相弗聽成彊
怒告慶封慶封與崔杼有卻欲其敗也成彊殺無
咎偃於崔杼家崔杼怒見慶封慶封曰請爲子誅
之使崔杼仇盧蒲嫫殺成彊盡滅崔氏崔杼無歸
亦自殺諡曰武子

晨門

元按晨門齊臣姓名無考 以上齊國人物

衛靈公

論語類考 卷第九

八 湖海樓藏本

元按衛靈公襄公之子也初襄公有賤妾幸之有
身夢人謂曰我康叔也今若子必有衛名而子曰
元妾怪之問孔成子成子曰康叔者衛祖也及生
子男也以告襄公襄公曰天所置也名之曰元襄
公夫人無子於是立元爲嗣是爲靈公靈公在位
四十二年莊子云靈公死卜葬於故墓不吉卜葬
於沙丘而吉掘之數仞得石槨焉洗而視之有銘
曰不憑其子靈公奪而里之夫靈公之爲靈也久
矣季本氏云衛靈公主威不立而盜得以殺其兄
家政不修而妻得以逐其子事無名而每興遠役

行無信而屢召敵兵觀孔子因其問陳而明日遂行其不足與有爲可知然而不至於喪者有仲叔圍治賓客祝鮀治宗廟王孫賈治軍旅三子雖非純臣而才足使令故倚以苟自逸然有蘧伯玉而不能用豈真能任賢者哉一統志云靈公墓在東昌府觀城縣東南四十二里

南子

朱子曰南子衛靈公之夫人有淫行

元按史記云孔子至衛靈公夫人南子願見孔子孔子辭謝不得已而見之入門北面稽首夫人自

論語類考 卷第九

九 湖海樓雕本

幃中再拜環佩玉聲璆然孔子曰吾鄉爲弗見見之禮答焉孔鮒氏云古者太享夫人與焉衛君夫人享夫子夫子亦弗獲已矣欒肇氏云予所否者天厭之否塞也言我之道不行而否塞者乃天所厭棄也楊慎氏云矢者直也直告之也非誓也何孟春氏云六經魯論家語皆無子見南子之事不知遷何據而云然蓋南子者必魯之南蒯也佛胥以中牟畔子路不欲其往而夫子有吾豈匏瓜之喻南蒯以費畔子路亦不欲其見也昭公十四年南蒯奔齊對景公曰臣欲張公室也夫南蒯欲弱

季氏以強魯故夫子見之非見衛之南子而見魯之南子也

衛君

朱子曰衛君出公輒也靈公逐其世子蒯聵公薨而國人立蒯聵之子輒於是晉納蒯聵而輒拒之時孔子居衛衛人以蒯聵得罪於父而輒嫡孫當立故冉有疑而問之

元按衛世家云太子蒯聵與靈公夫人南子有惡欲殺南子蒯聵與其徒戲陽邀謀朝使殺之戲陽後悔不果蒯聵數目之夫人覺之懼呼曰太子欲

論語類考 卷第九

十 湖海樓藏本

殺我靈公怒太子蒯聵奔宋已而之晉趙氏夫蒯聵南子之子南子淫亂蒯聵不能爲親隱惡而憤激過中迹不能不涉於亂不惟南子惡之雖靈公亦有所不安此蒯聵所自取之禍而非有殺母之心也蓋蒯聵聞野人之歌其心慚焉以告南子南子啼而走言太子將殺己以誣之靈公惑於其言亦不難於逐蒯聵矣春秋書衛世子蒯聵出奔宋宋南子家也蒯聵負殺南子之名豈敢奔宋哉春秋繫之世子則蒯聵無殺母之惡而靈公輕信讒言明矣衛世家又云靈公游於郊令子郢僕郢靈

公少子也字子南靈公怨太子出奔謂郢曰我將
立若爲後郢對曰郢不足以辱社稷君更圖之靈
公卒夫人曰命子郢爲太子曰此靈公命也郢曰
亡人太子蒯聵之子輒在不敢當於是衛乃以輒
爲君是爲出公趙簡子欲納蒯聵衛人聞之發兵
擊蒯聵蒯聵不得入羅泌氏云子南靈公之介子
蒯聵之弟也蒯聵旣奔子南辭位子南之德實媿
夷齊孔子居衛蓋有疑輒逆德不可爲君而子南
之賢可立而不立者故冉有求折於子貢而子貢
舉夷齊爲問夫子以爲古之賢人求仁而得仁夫
夷齊以遜國爲仁則夫子不爲衛君而郢賢可知
矣當夫人以君命立郢而郢以輒在辭此夷齊之
義也先儒乃以夫子善夷齊兄弟之遜爲惡蒯聵
父子之爭蘇氏取而著爲伯夷之傳至謂夷齊之
出父子之間必有閒言者豈不鑿哉父子之爭十
惡之罪首也當時諸侯固數以爲譙矣非此隱奧
也孰謂求賜高弟不能知此而反聖人疑耶郢之
遜可謂求仁而得仁矣

公子荆

朱子曰公子荆衛大夫

元按左傳昭公二十年公南楚驂乘以身衛賊而免君於難春秋釋名云公南楚卽公子荆也又襄公二十九年吳公子札來聘適衛見蘧瑗史狗史鰌公子荆公叔發公子朝曰衛多君子未有患也公孫朝

朱子曰公孫朝衛大夫

元按路史衛支庶之姓有公孫氏朝之事實無考

公叔文子

朱子曰公叔文子衛大夫公孫拔也

元按世本云獻公生成子當當生文子拔拔生朱

論語類考 卷第九

三 湖海樓聯本

爲公叔氏孔安國氏云公叔文子公孫枝也文謚也然左傳則作公叔發杜預氏註云公叔發公叔文子也檀弓云公叔文子卒其子戌請謚於君乃謚爲貞惠文子其後衛侯惡公叔戌以其富也公叔戌又欲去南子之黨若宋朝之徒者南子愬之曰戌將爲亂於是戌奔魯薛應旂氏云賢哉文子仲尼所以文之也非直以其能升僕也受知於君而其子猶不免焉嗚呼富也夫

僕

元按僕初爲公叔文子家臣文子薦之使與己並

爲大夫故稱大夫僕僕之事實無考

公明賈

朱子曰公明姓賈名亦衛人

元按路史衛之公族有公明氏而魯則無公明氏也然朱子又以公明儀公明高爲魯人豈衛之公明氏移居魯耶賈之事無考

蘧伯玉

朱子曰蘧伯玉衛大夫名瑗孔子居衛嘗主於其家

元按孔子則陽篇云蘧伯玉行年六十而六十化

論語類考 卷第九

三

湖海樓藏本

淮南子云蘧伯玉行年五十而知四十九年之非史記列傳云孔子之所嚴事於衛蘧伯玉裴駟氏云外寬而內直自娛於隱括之中直己而不直人汲汲於仁以善自終蓋蘧伯玉之行也靈公與夫入夜坐聞車聲至闕而止過闕後有聲夫人曰此蘧伯玉也伯玉衛之賢大夫也仁而有智敬於事上此其人必不以闇昧廢禮左傳甯喜弒其君剽孫林父入於戚以叛而伯玉行從近闕出此所謂公邦無道卷而懷之者一統志云墓在衛輝府城西

孔文子

朱子曰孔文子衛大夫名圉
元按孔文子卽仲叔圉烝鉏之曾孫衛之執政上
卿孔子所謂仲叔圉治賓客者是也初文子使大
叔疾出其妻而妻其女孔姑後疾出奔宋衛人立
其弟遺文子又使遺室姑焉靈公四十一年文子
同齊師及鮮虞伐晉取棘蒲

甯武子

邢昺氏曰春秋文公四年衛侯使甯俞來聘左傳
云衛甯子來聘公與之宴爲賦湛露及彤弓不辭
又不荅賦使行人私焉對曰臣以爲肄業及之也
杜預氏註云此其愚不可及也

論語類考 卷第九

古 湖海樓雕本

朱子曰甯武子衛大夫名俞按春秋傳武子仕衛
當文公成公之時文公有道而武子無事可見此
其知之可知也成公無道至於失國而武子周旋
其閒盡心竭力不避艱險凡其所處皆智巧之士
所深避而不肯爲者而能卒保其身以濟其君此
其愚之不可及也

元按甯氏衛公族也左傳僖公二十八年楚成王
與晉文公戰於城濮楚師敗衛侯懼出居襄牛之
地以避晉而奔楚遂適陳使元喧奉叔武以受盟

或訖元喧於衛侯曰立叔武矣其子角從衛侯衛
衛殺之喧不廢命奉叔武入守六月晉人復衛侯
元喧出奔晉衛侯與元喧訟甯武子爲輔鍼莊子
爲坐士榮爲大士衛侯不勝殺士榮別鍼莊子謂
甯俞忠而免之執衛侯歸於京師寘諸深室甯俞
職納橐籥焉僖公三十年晉侯使醫衍酖衛侯甯
俞貨醫使薄其酖不死魯納玉於王與晉侯皆十
鼓乃釋衛侯武子之父莊子名速武子之子名相
相之子名殖

史魚

論語類考 卷第九

五 湖海樓藏本

史朱子曰魚衛大夫名鱣

元按家語困誓篇云衛蘧伯玉賢而靈公不用彌
子瑕不肖反任之史魚驟諫不從病將卒命其子
曰吾在衛不能進蘧伯玉退彌子瑕是吾往不能
正君死無以成禮我死汝置屍牖下於我畢矣其
子從之靈公弔焉怪而問其子以告公曰是寡人
之過也於是命之殯於客位進蘧伯玉而用之退
彌子瑕而遠之孔子聞之曰古之諫者死則已矣
未有若史魚死而尸諫忠感其君也可不謂直乎

祝鮀也天與之壽壽曰立鮀鮀矣其子也

朱子曰鮒衛大夫字子魚

元按鮒衛之大祝左傳作祝佗定公四年會於召陵盟於臯鼬將會衛子行敬子言於靈公曰會難同嘖有煩言莫之治也其使祝佗從公曰善乃使子魚及臯鼬將盟將長蔡於衛衛侯使祝佗私言於萇弘萇弘說告劉子與范獻子謀之乃長衛侯於盟孔子謂祝鮒治宗廟之才亦有可用者

王孫賈

朱子曰王孫賈衛大夫

元按王孫賈衛公族也賈從靈公與晉盟已而叛

論語類考 卷第九

上海樓聯本

之觀其媚竈之言其人專權本非賢大夫而孔子又取其治軍旅聖人至公之心無棄人也如此賈子王孫齊亦爲衛大夫

棘子成

朱子曰棘子成衛大夫

元按鄭玄氏云棘子成衛大夫舊說也此自漢以來相傳之言其事實無考

儀封人

元按儀封人衛臣姓名無考薛應旂氏云封人儀姓族出晉陽徐有儀楚陳有儀行父云

荷蕢

元按荷蕢衛人姓名無考

以上皆衛國人物

晉文公

朱子曰晉文公名重耳

元按晉文公獻公之子晉世家云獻公卽位重耳年二十一年矣獻公伐驪得驪姬生子奚齊獻公有意廢太子申生乃使申生居曲沃公子重耳居蒲公子夷吾居屈獻公與驪姬子奚齊居絳驪姬讒申生申生自殺重耳夷吾來朝驪姬又讒之於

論語類考卷第九

七 湖海樓藏本

是重耳走蒲夷吾走屈獻公使兵伐蒲重耳遂奔翟夷吾奔梁獻公卒屬奚齊於荀息里克欲納重耳乃殺奚齊使人迎重耳重耳畏殺不敢入乃迎夷吾立之是爲惠公惠公欲使人殺重耳重耳聞之如齊惠公卒子圉立是爲懷公秦怨子圉乃發兵納重耳使人告欒卻之黨爲內應殺懷公於高梁重耳立是爲文公重耳自少好士有賢士五人曰趙衰狐偃咎犯賈佗先軫魏武子重耳出亡十九歲而得八年六十二卽位九年而卒將殯於曲沃出絳柩有聲如牛其詳載晉文春秋四十五篇

中國通志卷之九十四 佛舛

佛舛 朱子曰佛舛晉大夫趙氏之中牟宰也

元按孔安國氏云佛舛晉大夫趙簡子之邑宰史

記云佛舛爲中牟宰趙簡子攻范中行伐中牟佛

舛畔佛舛置鼎於庭致士大夫曰與我者受邑不

與者烹大夫皆從惟邑人田單曰義死不避斧鉞

之罪義窮不受軒冕之服不如烹襄衣將就鼎佛

舛脫履而生之趙簡子聞而欲賞之田單不受賞

遂南之楚何孟春氏云佛舛畔召孔子乃哀公初

論語類考 卷第九

六 胡海樓 附本

年孔子在陳蔡時事也孔子年幾六十矣哀公十

七年孔子卒後四年趙簡子卒子無卹立是爲襄

子而劉向列女傳云佛舛之畔其母將論求見趙

襄子襄子釋之君子曰佛舛母一言而發襄子之

意使其不遷怒以免其身蓋劉向失於未考耳

子產

孔安國氏曰子產鄭大夫公孫僑

元按左傳子產穆公之孫公子發之子名僑公子

之子稱公孫故曰公孫僑襄公三十年爲鄭大夫

執國政公子發字子國公孫七子以王父字爲氏

故其後或謂之國僑事載左傳孔子聞子產卒出
涕曰古之遺愛也一統志云墓在開封府新鄭縣
邢山之巔
裨諶諶曰猶齊靈公也諶即平末球美表而諶
孔安國氏曰裨諶鄭大夫氏名也
元按春秋襄公三十一年左傳云裨諶能謀簡子
能斷裨諶謀於野則獲謀於邑則否鄭國將有諸
侯之事則子產使裨諶乘車以適野而謀可否使
馮簡子斷之事成乃授子太叔

世叔

論語類考 卷第九

五 湖海樓藏本

馬融氏曰世叔鄭大夫

朱子曰世叔春秋傳作子太叔

元按古字世太通用世叔一作太叔如太子亦稱
世子也世叔游吉公子偃之孫以王父字爲氏左
傳云北宮文子相衛襄公如楚過鄭文子入聘子
羽爲行人馮簡子與子太叔逆客事畢而出言於
衛侯曰鄭有禮數世之福也子太叔美秀而文其
弟游楚作亂子產治其罪放之於吳

子羽曰昔文獻與出一統志

馬融氏曰子羽公孫翬也

邢昺氏曰子羽亦鄭大夫

元按左傳云公孫翬能知四國諸侯之所欲為而辨於其大夫之族姓班位貴賤能否而又善為辭令翬一作揮一統志云子羽墓在開封府通許縣東

宋朝

朱子曰朝宋公子

元按左傳宋朝宋公子也美色仕衛為大夫有寵於靈公衛太叔疾娶其女朝通於靈公嫡母襄夫人宣姜及其夫人南子懼遂與齊豹北宮喜褚師

論語類考 卷第九

子 湖海樓離本

圃作亂逐靈公其後靈公入衛與北宮喜盟於彭水之上宋朝出奔晉自晉歸宋靈公復為夫人南子召宋朝公叔戌欲逐宋朝南子愬諸靈公曰戌將為亂靈公逐公叔戌奔魯太子蒯聵獻孟於齊宋過宋野野人歌曰既定爾婁豬盍歸吾艾豨太子羞之金履祥氏云宋公子朝與南子內亂宋不罪其宄而衛又召之以遂其姦其免於今之世者如此

桓魋

朱子曰桓魋宋司馬向魋也出於桓公故又稱桓

氏

元按史記世家云孔子適宋與弟子習禮大樹下
宋司馬桓魋欲殺孔子拔其樹孔子去適鄭孟子
所謂微服過宋蓋此時也魋據曹以叛其兄左師
巢伐之不克魋奔衛巢奔魯宋景公使人止之曰
不可以絕向氏之祀辭曰臣之罪大不可入矣司
馬牛致邑與珪而適齊魋出於衛地公文氏攻之
又奔齊陳文子使爲次卿司馬牛去齊適吳魋嘗
作石槨三年不成孔子曰若是其靡也金履祥氏
云魋蓋宋桓公之後別爲向氏司馬解見司馬牛

論語類考 卷第九

主

湖海樓藏本

下

太宰

元按太宰宋臣詳見職官考其人姓名不傳

陳司敗

元按陳司敗陳臣其姓名亦無考

以上晉鄭宋陳人物

子文

朱子曰子文姓鬬名穀於菟

元按左傳若敖娶於邲生鬬伯比若敖卒伯比從
其母畜於邲合於邲女生子文焉邲夫人使棄諸

夢中虎乳之邳子田遂收之楚人謂乳穀謂虎於菟故名楚成王時子交代子元爲令尹靖國之難朝不謀夕舉子玉爲令尹悉告以舊政楚人伐隨伐鄭滅弦滅黃子文之功居多其孫鬬克黃楚箴尹也以功封於鄖爲鄖公克黃子鬬蔓成然字子旗亦爲令尹成然生二子鬬辛鬬懷皆有名於世麟應旂氏云子文之忠其他可能也置族人於廷理而族人不怨不可能也名稱溢於當世聲光流於罔極豈偶然哉

子西

朱子曰子西楚公子申

論語類考 卷第九

三 湖海樓藏本

元按春秋之時有三子西鄭駟夏楚宜申及公子申也駟夏未嘗當國無大可稱宜生謀亂被誅相去孔子之時又遠獨公子申與孔子同時故集註以爲公子申楚紀云公子申字子西昭王庶兄也平王卒令尹子常欲立子西子西曰國有常法更立則亂乃立太子珍爲昭王楚世家云子西平王之庶弟也則子西非昭王庶兄乃其叔父矣又云昭王病召諸公子大夫讓其弟公子申爲王則公子申與子西爲二人左傳吳師入郢昭王奔隨子

西敗吳師於軍祥昭王之奔隨也子西爲王輿服
國於脾洩使王孫由于城麇遷都於嬉昭王救陳
卒於城父子西與子期潛師閉塗逆越女之子章
立之是爲惠王哀公十五年子西子期伐吳及桐
油後召太子建之子勝爲白公作亂子西死之夫
子西辭子常之請而遜位相昭王之弱而定國知
夫差之侈而必敗可謂勤矣乃卒沮書社之封召
白公之亂焉得爲智乎孔子曰彼哉彼哉有所試
矣

葉公

論語類考 卷第九

三 湖海樓藏本

朱子曰葉公楚葉縣尹沈諸梁字子高僭稱公也
元按杜預氏註左傳謂沈諸梁楚莊王之立孫沈
尹戌之子戌爲沈尹又爲左司馬多直諫國人賴
之子高爲葉公時子西召太子建之子勝於吳子
高諫之其後勝作亂殺子西子期劫惠王子高聞
之帥師定方城與國人攻白公勝奔山自縊子
高兼二事乃使子西之子寧爲令尹子期之子寬
爲司馬退而老於葉初子高有弟曰后臧從其母
於吳不待而歸子高絕之子高好龍鑿室雕龍天
龍聞而下焉子高懼而走故子張曰葉公非好龍

好夫似龍而非龍者也夫葉公問孔子於子路蓋知聖而不能舉者然其知白公必亂子西子期之必不能彌亂而國人望之若望歲焉若望慈母焉孔子告之政曰近悅遠來子高亦允蹈之哉

接輿

朱子曰接輿楚人狎狂避世

元按莊子接輿作接與註云楚人姓陸名通皇甫謐云接輿躬耕楚王遣使以黃金百鎰車二駟聘之不應與其妻共隱列女傳云楚接輿躬耕以爲食楚王聘之以治淮南妻曰不如去之夫負釜妻載紆器變易姓名而往徙莫知所之又楚辭云接輿髡首註云接輿後自髡金履祥氏云莊子載接輿歌鳳句甚多然出於附會詆訾當以論語所載爲正蓋知尊聖人而歎其衰知愛聖人而憂其殆而不知聖人之中道也

長沮

桀溺

朱子曰二人隱者

元按金履祥氏云古之隱者不以姓名自見人亦不得而知之論語所載若荷蕢晨門荷蓀丈人皆以其物與事名之不得其姓名之真也獨長沮桀

濁若得其名氏者然長與桀古無此姓氏而名又皆從水夫子使子路問津而不告則一時何自而識其姓名諒亦以其物色名之蓋二人耦耕於田其一人長而沮洳其一人桀然高大而塗足因以名之爾

荷蓀丈人

元按荷蓀丈人姓名無考易師丈人朱子云丈人長老之稱楊氏云丈者黍龠尺引之積故王充論衡云人形以一丈爲止故名男子爲丈夫淮南子云老者杖於人謂之丈人恐未然

以上皆楚國人物

論語類考卷第九

五 湖海樓雕本

朱張

元按王弼氏云朱張字子弓卽荀卿所謂仲尼子弓者邢昺氏云朱張行與孔子同故孔子不論其行荀卿氏云彼大儒者雖隱於窮閭漏室而王公不能與之爭名其言有類其行有禮其舉事無悔其持險應變曲當與時遷徙其道一也其窮也俗儒笑之其通也英傑化之通則一天下窮則獨立貴名桀跡之世不能汚仲尼子弓是也

少連

